

## Morning Dogri (NSD) National News Bulletin 12-11-2024

### आकाशवाणी

- झारखंड च कल होने आले विधानसभा चुनां दे पैहले गेड़ दे मतदान लेई सब्बै तैआरियां करी लैती गेदियां न।
- महाराष्ट्र च चुनां प्रचार जोरें शोरें जारी। प्रधानमंत्री नरेन्द्र मोदी ते कांग्रेस लीडर राहुल गांधी हुंदा अज्ज केई चुनां रैलिएं गी संबोधत करने दा कार्यक्रम ऐ।
- राष्ट्रपति द्रौपदी मुर्मू होर अज्जै थमां केन्द्र शासत प्रदेश दादरा, नगर हवेली, दमन ते दीऊ दे त्रै दिनें दे दौरे पर जा'रदियां न।
- सरकार नै विदेश सचिव विक्रम मिसरी हुंदा कार्जकाल 14 जुलाई 2026 तगर बघाई दित्ता ऐ।
- मॉरीशस च नवीन रामगुलाम हुंदा त्रीह बारी प्रधानमंत्री बनना तैह। प्रधानमंत्री नरेन्द्र मोदी होरें उनेंगी ममारकबाद ते शुभकामना दित्तियां।
- चैस च ग्रैंड मास्टर अरविंद चिथम्बरम नै चेन्नई ग्रैंड मास्टर्स दा खताब जित्ती लैता ऐ।

<><><><><><>

### Jharkand

झारखंड च असैंबली चुनाएं दे पैहले गेड़ लेई लोड़चदे बंदोबस्त करी लैते गेदे न। इस गेड़ तैहत् 43 हल्के च कल मतदान होग। आकाशवाणी संवाददाता दी रिपोर्ट मूजब चुनां गी तोड़ चाढ़ने सरबंधी अमले गी अपनी-अपनी थाहरें भेजी दित्ता गेआ ऐ। 225 संवेदनशील बूथें च 194 बूथें पर पैहले गै चुनावी अमला भारतीय सेना दे हैलीकाप्टरें राएं उत्थें पुज्जी चुके दा ऐ। बकाया रौहदे 30 बूथें पर पुलस अधिकारिएं गी अज्ज भेजेआ जाग। एह संवेदनशील बूथ पच्छम सिंह भूम, लतेहर, लोहरदंगा, गढवा ते गुमला जिलें दे 5 जिलें च न। राज्य भर च कल 15 जहार 344 मतदान बूथ बनाए गेदे न।

दिवक्त मुक्त चुनां गी जकीनी बनाने लेई सुरक्षाबलें दी 2 सौ थमां मती कंपनीं गी सरबंधत इलाकें च तैनात कीता गेआ ऐ। 73 महिलाएं समेत 683 मेदवार चुनां मैदान च न। इक करोड़ 37 लक्ख शा मते मतदाता इनें मेदवारें दी सियासी किस्मत दा फैसला करगंन।

<><><><><><><><>

## Maharashtra

महाराष्ट्र च असेंबली चुनाएं च प्रचार अभियान नै तेजी फगड़ी लैती ऐ। प्रधानमंत्री नरेन्द्र मोदी, कांग्रेस दे नेता राहुन गांधी ते होर दुए वरिष्ठ लीडरें दी राज्य दे बक्ख-बक्ख जिलें च रैलिएं गी संबोधत करना तैह ऐ। साढे संवाददाता दी रिपोर्ट मूजब प्रधानमंत्री ते बीजेपी दे वरिष्ठ लीडर नरेन्द्र मोदी होर चन्द्रपुर, चिमूर, सोलापुर ते पुणे च अज्ज जनसभाएं गी संबोधत करगंन। केन्द्रीय गृहमंत्री अमित शाह होर मुंबई च दऊं पब्लिक बैठकें गी संबोधत करगंन। केन्द्रीय मंत्री नितिन गडकरी होरें जैतूर बीड, जलना ते नागपुर च रैलिएं गी संबोधत करगंन। उत्तर प्रदेश दे मुख्मंत्री ते बीजेपी दे वरिष्ठ नेता योगी आदित्यनाथ होर अकोला, अमरावती ते बाणपुर च रैलियां करगंन। उपमुख्मंत्री दिवेन्द्र फंडनवीस होर दहानू, विक्रमगढ़, पेन ते कल्याण च रैलिएं गी संबोधत करगंन। दुए पाससै कांग्रेस नेता राहुल गांधी होर चिकहाली च बुलदाना जिले च ते गोडिया च महा विकास अघाड़ी मेदवार दे समर्थन च दऊं रैलिएं गी संबोधत करगंन। एनसीपी चीफ शरद पवार होर महा विकास अघाड़ी दे मेदवार दे हक्के च प्रचार करगंन। शिव सेना लीडर ठाकरे हुंदी माहिम च रैलिएं करने दास कार्यक्रम ऐ। एमएनएस प्रमुख राज ठाकरे वरली च प्रचार करगंन।

<><><><><><><><>

## President

राष्ट्रपति द्रौपदी मुर्मू होर अज्जै थमां केन्द्र शासत प्रदेश दादरा नगर हवेली ते दमन ते दीऊ दे त्रऊं दिनें दे दौरे पर जा'रदियां न। दौरे दे पैहले रोज राष्ट्रपति होर जम्पोर च एवियरी, दमन च सरकारी इंजीनियरिंग कालेज ते निफ्ट परिसर च जांगन। दुए ध्याड़े उंदा सिजवासा च नमो मेडिकल एजुकेशन एंड रिसर्च इंस्टीच्यूट दा दौरा करने दा कार्यक्रम ऐ। राष्ट्रपति होर उत्थूं दे बक्ख-बक्ख तालीमी इदारें दे विद्यार्थिं ते अध्यापकें कन्नै गल्लबात करगंन।

ओह जांडा चौक स्कूल दा बी उदघाटन करगंन ते सिलवासा च इक सार्वजनिक समारोह गी बी संबोधत करगंन। राष्ट्रपति हुंदा दीव च आई.एन.एस खुदरी समारक पर जाने दा बी कार्यक्रम ऐ।

<><><><><><>

## President CJJ

राष्ट्रपति द्रौपदी मुर्मू होरें भारत दे नमें प्रधान न्यायधीश जस्टिस संजीव खन्ना हुंदे सुआगत च कल रातीं नमीं दिल्ली च रातीं दी रूट्टी दा सरिस्ता कीते दा हा। इस विशेष धामै च उपराष्ट्रपति जगदीप धनखड़, रक्षा मंत्री राजनाथ सिंह, विदेश मंत्री डॉ. एस.जयशंकर, साबका प्रधान न्यायधीश डी.वाई.चन्द्रचूड ते सुप्रीम कोर्ट दे केई जज ते हाई कोर्ट दे मुख्ख न्यायधीशें शिरकत कीती।

<><><><><><>

## Foreign Secretary

मजूदा विदेश सचिव विक्रम मिसरी हुंदी सेवा गी दऊं ब'रें होर अगड़ा बधाई दित्ता गोआ ऐ। उंदा कार्यकाल 30 नवम्बर 2024 गी पूरा होआ करदा हा। अगले सार्वजनिक शकैतें, पेंशन ते सिखलाई सरबंधी मंत्रालय दी नियुक्ति मुत्तलक कमेटी दे सचिवालय आस्सेआ विक्रम मिसरी हुंदे कार्यकाल गी बधाने दी मंजूरी दित्ती गई ऐ। 14 जुलाई 2026 तोड़ी जा अगले आदेश तोड़ी ओह अपनी सेवा जारी रखगंन। 1989 बैच दे भारतीय विदेश सेवा दे अधिकारी विक्रम मिसरी होरें 15 जुलाई 2024 गी विदेश सचिव दे तौर पर अपना कम्मकाज संभालेआ हा।

<><><><><><>

## PM-Mauritius

प्रधानमंत्री नरेन्द्र मोदी होरें मॉरीशिस च ऐतिहासक चुनावी जित्त पर डॉ. नवीन रामगुलाम होरें गी ममारकबाद ते शुभकामनां दित्तियां न। अपनी इक सोशल मीडिया पोस्ट च मोदी होरें आखेआ जे उनें डॉ. रामगुलाम हुंदे कन्नै गल्ल कीती ते मॉरीशस दा नेतृत्व करने च उंदी कामयाबी दी कामना कीती ऐ। प्रधानमंत्री होरें डॉ. रामगुलाम होरें गी भारत औने दा साददा बी दित्ता ऐ।

मोदी होरें आखेआ जे ओह मॉरीशस कन्नै विशेष ते अनूठी सांझ-भ्याली गी निग्गर बनाने लेई किट्ठे रलियै कम्म करने दी तांग रखदे न।

<><><><><><>

### Mauritius Election

मॉरीशस दे विरोधी घड़ें दे नेता नवीन रामगुलाम हुंदा त्रीह बारी प्रधानमंत्री बनना तैह ऐ। उंदे नेतृत्व आला गठबंधन जिसी एलायंस ऑफ चेंज ना दित्ता गेआ ऐ, संसदीय चुनां च भारी जित्त आली बक्खी तेजियां कन्नै अगड़े बधै करदा ऐ अजें कि चुनां नतीजे दी औपचारिक घोशणा अजें होनी बाकी ऐ। नवीन रामगुलाम होरें मीडिया कन्ने गल्लबात करदे होई दस्सेआ जे उंदी पार्टी जित्त आली बक्खी अगड़े बधै करदी ऐ। इस्सै दरान प्रधानमंत्री प्रविंद जुगनौथ होरें अपनी हार स्वीकार करी लैती ऐ। मॉरीशस च 62 सांसदें दे चुनां लेई ऐतवारें वोट पोआए गेदे, जेह्दे च 90 प्रतिशत मतदान दर्ज कीता गेआ हा।

<><><><><><>

### Vadodra Fire

गुजरात दे बड़ोदरा च कल कोयली दी इंडियन ऑयल रिफाइनरी च होए दे धमाके करी लग्गी दी अग्ग आली घटना च इक कर्मी दी मौत होई बेई ऐ। हादसे दी खबर थ्होंदे गै अग्ग सहालने आले द लते पुलस मौके पर पुज्जी गई ते बचाह कम्म च लग्गी गई। बचाह दलै केई कर्मिं गी सुरक्षत बाहर कडिडए बचाई लैता। पुलसै दस्सेआ ऐ जे अग्ग लगने दे कारणें दा पता लाया जा'रदा ऐ, उआं हालात पूरी चाल्ली काबू च न।

<><><><><><>

### Chess

शतरंज च ग्रैंड मास्टर्स अरविंद चिथम्बरम नै अमरीकी ग्रैंड स्लैम मास्टर लेवोन एरोनियन गी इक जबरदस्त मकाबले च हराइयै चेन्नई ग्रैंड मास्टर्स दा खताब जित्ती लैता ऐ। उत्थें गै चैलेंजर्स प्रतियोगिता च ग्रैंड मास्टर वी.प्रणव नै मकाबले च उप्परोतली जित्तदे होई खताब अपने नां करी लैता ऐ।

मास्टर्स श्रेणी च पैहली थाहरै लेई तरकोनी तकाबला दिकखने गी लब्मा। अरविंद नै पैहले ब्लिटज पले ऑफ च ग्रैंड मास्टर लेवोन एरोनियन गी हराया ते फही दुए ब्लिटज मैच च काले मोहरे खेडदे होई मैच झा कराइयै प्रतियोगिता दा दूआ खताब अपने नां करी लेआ।

<><><><><><>